



# **PARTII INUIT** INATSISARTUNI

**Partii Inuit**

**UKA 2013/34-1**

**Randi Broberg**

**6.11.2013**

Una pillugu siunnersuut:

**Inissianik attartortut piffissaq eqqorlugu akiliuteqartartut siunissami attartortunut akilineq ajortunut akiliussisarnerannik aningaasartuutinullu taakku akilinngisaannik akiliisarnerannik pisussaaffeerullugit, inissianik akiliutit aalajangersarneqartarnerat pillugu maleruagassanut atuuttunut Naalackersuisut allannguutissaannik siunnersuusiornissaat pillugu Inatsisartuni aalajangiiffigisassatut siunnersuut.**

(Inatsisartunut ilaasortat Kim Kielsen, Siumut)

Inatsisartunut ilaasortap maanna naalackersuisunngoqqammersup Kim Kielsen, (Siumut) siunnersuut qaqitaa, Partii Inuit pingaaruteqarluinnartutut isigaarput.

Inuiattut aaqqissuusaanitta qiterilluinnarpaa ineqarniarnikkut inissisimanerput.

Partii Inuit ajuusaarnartutut akuersaarneqarsinnaanngittutullu isigaarput inuiaqatigiit ikittunnguungalualuta, ineqarniarnikkut atukkat inuiaqatigiinnut amerlanerpaanut inorsiillutik ukiorpassuarni inissisimasimanerat, maannamullu sulii qanoq iliuuseqarfigineqarumangittutut inissisimasoqarnera.

Inuit ataasiakkaat ilaqutariillu ineqarniarnikkut toqqissisimasumik inuunissaannut pisussaatitaaffeqarnerat, minnerpaamik pisortat akisussaaffigaat. Taamaakkaluortoq akitigut inorsiilluni akilersuisitsinerup inuiqatigiinnut kingunerisartagai akisoqaat, taamatullu akissaqassutsimut inorsiilluni ineqarnermut akilersuisitseriaatsip kinguneri sulii akisuninngorlutik pisortanut kingumut allatigut tuttarnerat Partii Inuit qularinngilarput.

Tamannalu inuiaqatigiinnut uatsitut ikittunnguanut ineqarniarnikkut aaqqissuusaanitta tulluannginneranik takutitsivoq.

Inissianik attartortut akilersuilluartut pillarneqartutullusooq inissinneqartarnerat soorunami Partii Inuit aamma akueriuminaatsippaat. Taamaattoq aamma oqaatigissavarput attartortut

akiliiumanngittut akiliisinnaanngittulluunniit aamma immikkut piaartumik qanoq  
iliuseqarfiginissaat pisariaqarluinnalersimasoq takusinnaagatsigu.

Apeqquut saqqummertoq tassaavoq: sooq ilaqutariit ilai akissaqaraluarlutik akiliiumaneq ajorpat?  
Kiisalu sooq ilaqutariippassuit aamma ineqarniarnerminnut piaarinatik akiliisinnaajunnaartarpat?

Taamaammat Partii Inuit kaammattuutigissuarput ineqarniarnikkut aaqqissuusseqqinnissaq  
nalilersueqqinnissarlu piaarnerpaamik misissuiffigeqqullugu Naalakkersuisut suligasuartariaqartut.  
Tigussaasunillu inuiaqatigiinnut oqilisaataasussanik nassaartariaqarluinnartut,  
Inuiaqatigiit toqqissisimasut pilersinnissaannut ineqarniarneq qitiulluinnarmat.

Taama oqaaseqarluta, siunnersuut ilalerlugu ataatsimiisitaliamut susassaqartumut  
ingerlateqqinneqarnissaa inassutigaarput.